

Kanton Sarajevo
Skupština Kantona Sarajevo
Admela Hodžić samostalna zastupnica u Skupštini Kantona Sarajevo

VLADA KANTONA SARAJEVO

ZASTUPNIČKA INICIJATIVA

Na osnovu čl. 106. i 213. Poslovnika Skupštine Kantona Sarajevo („Službene novine Kantona Sarajevo”, broj: 41/12 - Drugi novi prečišćeni tekst, 15/13, 47/13, 47/15, 48/16, 9/20 i 14/20) pokrećem inicijativu prema Vladi Kantona Sarajevo da se u narednoj budžetskoj godini, odnosno vremenskom periodu smanjenog priliva sredstava u Budžetu KS, a koje se odnose na umanjenje priliva svih vrsta prihoda i zbog negativnih posljedica koje trpe privrednici KS, da ukoliko za Kanton Sarajevo postoji obaveza za plaćanje regresa, plaćanje regresa za narednu budžetsku godinu izvrši u vidu turističkih vaučera i to svim uposlenicima, izabranim dužnosnicima, nosiocima izvršnih funkcija, imenovanim licima, državnim službenicima i namještenicima organa državne službe u KS, odnosno svima koji primaju plaće iz Budžeta Kantona Sarajevo ili rade u institucijama KS u kojima je osnivač u cijelosti ili djelimično KS.

Turističke vaučere na kojima treba biti naznačeno da su za pomoć turizmu dodijeliti poslovnim subjektima koji se bave pružanjem ugostiteljskih ili drugih turističkih usluga ili obavljaju s turizmom neposredno povezane djelatnosti u Kantonu Sarajevo, odnosno koji se vode kao obavezni članovi u evidenciji Turističke zajednice Kantona Sarajevo. Vaučere dodjeljivati na način, jedan turistički vaučer za jedan regres upslenika KS – uplatiti za jednog radnika u turizmu i sredstva isključivo utrošiti u te svrhe.

Također i to da se uštede sredstava na ovakav način rezervišu u okviru programa pomoći turizmu Kantona Sarajevo, odnosno obaveznim članovima Turističke zajednice KS koji se bave pružanjem ugostiteljskih ili drugih turističkih usluga ili obavljaju s turizmom neposredno povezane djelatnosti. a koji imaju smanjenje ukupnog mjesečnog prometa preko 40% u odnosu na

ukupni prosječni promet u 2019. godini.

OBRAZLOŽENJE

Obzirom na očekivani pad prihoda u Budžetu Kantona Sarajevo, koji se očekuje tokom 2021. godine, kao posljedica pandemije COVID-a, prilikom izrade Budžeta jedna od stavki kroz koju se mogu napraviti uštede u iznosu od oko šest miliona KM su isplate regresa za državne službenike. U 2020. godini, regres je isplaćen za oko 14.000 budžetskih korisnika, u iznosu od 460 KM. Izračunom se dobije iznos od 6,4 miliona KM, po osnovu izdataka za regres.

Neizvjesnost koja se odnosi na oporavak turističkog sektora u narednoj godini, dodatno usložnjava i oporavak ovog vrlo bitnog sektora za Kanton Sarajevo. U svrhu pomoći ovom sektoru jedna od mjera može biti izdavanje „turističkih vaučera“, gdje bi radniku, umjesto isplate regresa, bio izdat vaučer, koji bi se mogao iskoristiti u određenom vremenskom periodu na području Kantona Sarajevo u segment ugostiteljstva i hotelijerstva, što bi bilo precizirano kroz uslove korištenja.

Na ovaj način bi se poštovala zakonska obaveza isplate regresa prema budžetskim korisnicima, te također kroz direktnu subvenciju pomoglo opstanku turističkog sektora na području Kantona Sarajevo, kroz poticaj u iznosu od oko šest miliona KM.

Ostala sredstva međunarodne pomoći i pomoći sa viših nivoa vlasti, zatim sopstvenih ušteda u KS direktno kroz donesene programe usmjeriti u ostale grane privrede. Programe moramo kreirati na način da ne diskriminira niti jedan privredni subjekt po bilo kojem osnovu kao što je to do sada učinjeno u Ministarstvu privrede KS kršeći propisanu Uredbu a samim tim i Zakon.

Neophodno je u ovakvim situacijama potaknuti osjećaj solidarnosti, pokrenuti socijalne dijaloge sa radnicima javnog sektora, napraviti propagandni materijal dostupan svim medijima a sve u cilju podizanja svijesti da je u stvari ovakva vrsta programa kojima bismo štedjeli i dio svojih sredstava kao što je naknada za regres preusmjerili za plaće u privredi koja svojim poslovnim aktivnostima

puni budžet iz kojeg radnici javnog sektora primaju plaću. Period ušteda će mnogo kraće trajati od perioda kada nećemo imati sredstava da izvršavamo obaveze po kolektivnim ugovorima javnog sektora. Ako dozvolimo da veliki procenat radnika iz realnog sektora završi na birou tada njihova poslovna aktivnost prestaje, priliv u budžet prestaje i u isto vrijeme postaju korisnici nekih drugih naknada iz budžeta čime se prouzrokuje višestruka šteta. Smatram da svi nosioci zakonodavne i izvršne vlasti treba da daju svoj maksimum da do ovoga ne dođe ili da se taj trend rasta nezaposlenosti smanji koliko je to moguće.

Potaknuti socijalnu osjetljivost time što ćemo objasniti uposlenicima javnog sektora da kada svoj vaučer za regres, odnosno godišnji odmor, budu koristili u nekom od objekata obaveznih članova Turističke zajednice Kantonu Sarajevo, da će time direktno sačuvati jedno radno mjesto. Pomoći jednu porodicu koja će primiti plaću ili dio plaće time što se mi odmaramo smatram da je takav osjećaj neprocjenjiv i meni i svim dobrim ljudima.

Zbog svega navedenog je u narednom periodu veoma važno napraviti programe kojima ćemo napraviti uštede u Budžetu i usmjeriti sredstva po unaprijed definisanim kriterijima i programima u privredu kako bismo sačuvali što veći broj radnih mjesta.

Molim nadležne da poduzmu sve potrebne radnje kako bi se ova inicijativa što prije realizovala.

Admela Hodžić


Samostalna zastupnica u Skupštini Kantona Sarajevo

Sarajevo, 18.01.2021. godine

